

Monsieur Fernand Etgen
Präsident vun der Chamber

Lëtzebuerg, den 6. Januar 2021

Här Präsident,

sou wéi den Artikel 83 vum Chambersreglement et virgesäit, bieden ech Iech, dës parlamentaresch Fro un den Här Educatiounsminister an d'Madamm Ministesch fir Famill weiderzeleeden.

2020 war den 'Homeschooling' schonn e feste Bestanddeel vum Schoulprogramm vun eise Kanner a Jugendlechen. Och 2021 huet mat enger Woch "Schoul doheem" fir sämtlech Schüler ugefaangen an et ass zu dësem Moment net auszeschléissen dass am Laf vum Joer wuel nach weider op dëse Modell wäert missen zrëckgegraff ginn. Den 'Homeschooling' ass net nëmmen eng organisatoresch Erausfuerderung fir d'Elteren a fir d'Schüler, mee et gëtt mat Recht verlaangt, dass jiddereen mat dem néidege Material gutt equipéiert ass fir esou un de jeeweilige Couren kënnen deelzehuelen. Nieft de Laptops oder soss Computeren brauchen d'Kanner awer och eng Imprimante, di néideg Tënt, Pabeier, vill zousätzlech Classeuren asw. Dëst Material, awer besonnesch di sougenannte 'Consommables', wéi zum Beispill Tëntpatrounen sinn deier Depensen déi eng zolidd finanziell Belaaschtung fir d'Haushaltskeess sinn.

An deem Zesummenhang wollt ech dem Här Educatiounsminister an der Madamm Ministesch fir Famill dës Froe stellen:

- Ginn et Zuelen a Berechnungen, wéi vill den Homeschooling déi jeeweileg Familljen 2020 kascht huet?
- Denkt d'Regierung hei un eventuell Subsiden fir dës Fraisen kënnen opzefänken?

- Huet d'Regierung Kenntnis iwwert Familljen, déi et déi lescht Méint méi schwéier haten fir iwwert d'Ronnen ze kommen, och wéinst zousätzleche Käsche wat d'Schoul ubelaangt?

Mat déiwem Respekt,



Cécile Hemmen
Deputéiert

Äntwert vum Minister fir Educatioun, Kanner a Jugend op d'parlamentaresch Fro Nr. 3387 vun der honorabeler Deputéierte Cécile Hemmen

Den Distanzunterricht, deem duerch déi aktuell Pandemie en place gesat ginn ass, sollt net zu weidere Käschten a puncto Schoulmaterial fir d'Famillje mat Kanner am Grondschoulalter féieren.

Dat technescht Material (beispillsweis Computer an Tabletten) goufe bei Bedarf vum Centre de gestion informatique de l'éducation (CGIE) oder vun de jeeweilege Gemenge bei Besoin gestallt. Déi néideg Software gëtt vu mengem Ministère zur Verfügung gestallt (z.B. Office 365, www.schouldoheem.lu).

Am Fall, wou d'Prise en Charge vun de Kanner net anescht méiglech war, sinn dës vun den Enseignanten, respektiv anere Professionellen aus dem sozioedukative Beräich an de Schoulen empfaange ginn, fir hei vun individuelle Léiersequenzen ze profitéieren.

Zousätzlech hunn d'Enseignanten alles dru gesat, den Distanzunterricht de Besoine vun den eenzele Schüler unzepassen an de Gegebenheeten an den eenzele Famillje Rechnung ze droen.

D'Organisatioun vum Distanzunterricht muss individuell ëmgesat ginn an d'Enseignanten hunn der Situatioun ugepasste Léisunge fonnt. Esou hu beispillsweis vill Enseignanten drop verzicht, Aufgaben ze stellen, déi d'Kanner doheem hu misse printen, a wéi am schouleschen Alldag üblech op d'Diffusioun vun den Aufgaben um Pabeier oder alternativ ënnert digitaliséierter Form gesat.

De Ministère fir Educatioun, Kanner a Jugend gesäit Subventiounen vir, déi d'Schüler aus dem Secondaire an hir Familljen, déi e nidderege Revenu hunn, ënnerstëtzen, am Kontext vun der Preventioun vum Schouloffbroch.

Et gëtt ënnerscheet tëschent zwee Typen vu Subsidien :

D'Subvention pour ménage à faible revenu gëtt dem Stot zougesprach op Grond vun engem sozialen Index (1 bis 5), an hänkt of vun der Zesummesetzung vum Stot a vu sengem mensuelle Netto-Revenu. Fir de Revenu beschränkt de Stot sech op den Demandeur, eventuell deem säi Partner, deem zum Stot gehéiert, an de Student, fir deem d'Demande gestallt gëtt.

Dës Subventioun beleeft sech aktuell op 630,38 € an 945,55 € (n.i. 834,76) pro Schüler a pro Joer. De Schüler aus engem Stot vum Indice social 5 huet ausserdeem Recht op e reduzéierte Präis vum lessen an der Schoulkantin.

D'Subvention du maintien scolaire ass eng mensuell Allocatioun fir de groussjäreg Schüler, deem an enger Nout-Situatioun (*situation de détresse*) ass an eleng wunne muss. Déi Subventioun hänkt of vu sengem Akommes an deckt seng Fraisen a säi Loyer.

Dozou kënn e Forfait vun 315,19 € (n.i. 834,76) fir d'Schoulkäschte während den dräi Trimestere vum Schouljoer. De Schüler huet ausserdeem Recht op e reduzéierte Präis vum lessen an der Schoulkantin.

Am Laf vum Mount Abrëll 2020 sinn 6.998 Subventiounen u Stéit mat nidderegem Revenu ausgedeelt gi fir e gesamte Budget vu 5.830.674,02 €.

Während dem Schouljoer 2019-2020 ass e gesamte Budget vun 1.830.200 € ausgedeelt ginn u groussjäreg Schüler als Subvention du maintien scolaire.

Fir d'Schouljoer 2020-2021 goufe follgend Demanden enregistréiert :

- 7.611 Demandë fir d'Subvention pour ménage à faible revenu;
- 196 Demandë vu groussjärege Schüler an Noutsituatioun.

Am Ganze sinn 578.945,70 € am Laf vum 1. Schoultrimester verdeelt ginn.

Ausserdeem profitéieren d'Beneficiairë vu Subventiounen (Subvention pour ménage à faible revenu a Subvention du maintien scolaire), an den iPad-Klasse vu Lycéeën, vun enger Reduktioun vun 30 € fir d'Locatioun vu mobillen Dispositiffen (iPad, Laptop, Ultra-portable). Dëst Bereetstelle vun informatischem Material vum CGIE, ënnert der Form vun der Locatioun, leeft am Kader vum Programm "one2one". Déi insgesamt 21.592 Tabletten, déi aktuell am Kader vum Programm "one2one" agesat ginn, kënnen natierlech och fir den Distanzunterricht genotzt ginn. Weider hunn déi eenzel Lycéeën esouwuel Tabletten ewéi Laptoppe vun hirem Bestand de Schüler mat heemginn.

Zanter der sanitärer Kris huet de CGIE 91 Tablette fir Schüler an der Grondschoul an 41 Tablette fir Schüler aus dem Secondaire zur Verfügung gestallt.